

Nunatta kangianut tulluarsakkamik ilinniarfimmik, Tasiilami inissinneqartussamik pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut. Ilinniarfik assigiinngisitaartumik ilinniarfiullunilu piginnaasaqalerfiunissaa tunngavigneqassaaq. Siunnersuut UPA2027-mi saqqummiunneqassaaq.

(Inatsisartunut ilaasortaq Nivi Rosing, Inuit Ataqatigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Aappassaaneerneqarnera

Ataatsimiititaliap peqqissaartumik suliaqarneranut kiisalu isumaliutissiissummik saqqummiussaanut Naalakkersuisut sinnerlugit qutsavigaara.

Naalakkersuisut ataatsimiititaliap ilinniartitaanermut politikki pillugu aalajangiinermut tunngaviusunik oqaaseqaatai maluginiarpaat, tassunga ilanngullugit pitsaassutsikkut kisitsisitigullu misissueqqissaarnerit pisariaqartinneqartut, nuna tamakkerlugu piginnaasaqarnissamut pisariaqartitat ersarissarniarlugit.

Naalakkersuisut aamma naammagisimaarpaat ataatsimiititaliap Naalakkersuisut isumaqatigigaat, Tasiilami ilinniarfimmik pilersitsinissaq pillugu aalajangiisoqannginnerani pisariaqartitanik qulaajaanerup ingerlanneqarnissaa pisariaqartoq.

Naalakkersuisut aamma maluginiarpaat ataatsimiititaliami amerlanerussuteqartut Naalakkersuisut kaammattoraat nuna tamakkerlugu pisariaqartitanik misissueqqissaarnerup ingerlanneqarnissaa sulissutigeqqullugu.

Ataatsimiititaliami amerlanerussuteqartut allannguutissatut siunnersuummik saqqummiussaqrput, Naalakkersuisut allannguutissatut siunnersuutaanni siunertat isiginiarneqarsimasutut isikkoqartumik. Allannguutissatut siunnersuummi erseqqissarneqarpoq Naalakkersuisut Tasiilami ilinniarfimmik pilersitsinissamut aalajangersimasumik siunnersuummik saqqummiussinissaq sulissutigissagaat, kisianni tamanna pisariaqartitanik misissueqqissaarnermik tunngavilersugaassaaq, tassalu nalunaarusiamik, UKA 2027-mi saqqummiunneqartussamik.

Taamatut oqaaseqarluta Naalakkersuisut ataatsimiititaliap allannguutissatut siunnersuutaa taparserpaat aammalu akuersissutigineqarnissaa inassutigalugu.